


Туфайл ад-Давсий қиссаси



16:46 / 26.12.2017 4925

Ўз қабиласида катта обрўга эга бўлган, шоирлиги ва уддабуронлиги билан шуҳрат қозонган Туфайл ибн Амр ад-Давсий Маккага келди. Қурайшликлар дарҳол унинг йўлини тўсиб, Расулуллоҳ соллаллоҳу алайҳи васаллам билан учрашмаслик, гапига қулоқ солмаслик ҳақида қаттиқ огоҳлантирилар. Улар унга:

«Биз ўзимизга етган мусийбат сенга ва сенинг қавмингга ҳам етиб қолишидан қўрқамиз. Сен зинҳор ва зинҳор унга гапирмагин ҳам, гапини ҳам эштимагин», дедилар.

Гапнинг қолганини Туфайлнинг ўзидан эшитинг:

«Аллоҳга қасамки, улар ҳадеб гапираверганларидан у зотдан бирор нарса эшитмасликка ва ўзим ҳам бирор нарса демасликка азму қарор қилдим. Ҳаттоқи, қулоғимга пахта ҳам тикиб олдим. Кейин ибодатхона томон бордим. Қарасам, Расулуллоҳ соллаллоҳу алайҳи васаллам Каъбанинг ёнида намоз ўқиётган эканлар. У кишига яқинроқ бордим. Аллоҳ у кишининг баъзи сўзларини эшитишими ирова қилди. Гўзал бир калом эшитдим. Сўнgra ўзимга ўзим «Онам кўкимни кийсин! Аллоҳга қасамки, мен бир ўткир ақлли ва шоир одам бўлсан. Яхши-ёмон менга маҳфий бўлмаса. Кел, мана шу одамнинг нима деяётганини бир эшитай. Агар у

келтирган нарса яхши бўлса, қабул қиласман, ёмон бўлса, тарк этарман», дедим».

Шундай қилиб, Туфайл Расулуллоҳ соллаллоҳу алайҳи васалламнинг ортларидан у зотнинг уйларига кирди ва бўлиб ўтган қиссани айтиб берди. Пайғамбар соллаллоҳу алайҳи васаллам унга Исломни арз қилдилар ва Қуръон тиловат қилиб бердилар. Туфайл Исломга кирди ва ўз қавмига бориб, уларни ҳам динга даъват қилди. У ўз аҳлига «Агар Исломга кирмасангиз, сиз билан яшамайман», деди. Улар ҳаммалари Исломни қабул қилдилар. Кейин Давс қабиласининг барча аъзолари иймонга келдилар.

Бунга ўхшаш ҳодисалар ўша вақтда нодир бўлса ҳам, кофириларни жуда қаттиқ ташвишга солар эди. Улар Муҳаммад мустафо соллаллоҳу алайҳи васалламга ва мусулмонларга қарши ўз фаолиятларини яна ҳам шиддатлатишар эдилар. Ўз яқинларини, бола-чақаларини ва бошқа томондан келган кишиларни мусулмонлар билан, хусусан, Расулуллоҳ соллаллоҳу алайҳи васаллам билан учрашиш, гаплашишдан қатъиян ман қилишар эди. Кундан-кунга мусулмонлар ҳамда уларнинг сардорлари Муҳаммад мустафо соллаллоҳу алайҳи васаллам учун вазият оғирлашиб борар эди. Шундай бир пайтда кетма-кет икки оғир мусийбат ҳам юз берди.

Шайх Муҳаммад Содик Муҳаммад Юсуф

(Ҳадис ва ҳаёт китобидан)